

## **E Gsang i minne Ohre**

(-Dur) (Duett)

**Es tönt i minne Ohre** e Gsang  
wo z'Härze dringt, wo über  
d'Acherfjuhre, dür Hus und Garte  
klingt. Jo lo u lu lü u o u lu lu lü o  
lo u lu.

S sind lieder us de Stunde vo  
schönschter Jugendzyt. Si sind  
mit mir verbunde, ou wenn alls  
wyt z'rugg lyt Jodel

**E Chraft lyt i dem Singe**, e  
Stimmig wo mi regt, es Sehne,  
wo vo inne mis ganzi Gmüet  
bewegt, Jo lo u lu lü u o u lu lu lü  
o lo u lu.

es Samechorn wo chräftig vo  
inne use trybt, e Ahnig, wo eim  
heftig berüehrt und Gheimnis  
blybt. Jodel

**S sind Vaters Värs** und Lieder  
vo Liebi, jung und fyn, vo Heimat  
und vo Sehnsucht, vo Glück und  
Sunneschyn. Jo lo u lu lü u o u lu  
lu lü o lo u lu.

Är het mit sim Singe es Erbstück  
hinderlo. Es muess i d'Ohre drin-  
ge, no meh, eim z'Härze goh.

Jodel